

INUIT ATAQATIGIIT

INATSISARTUNI



16. december 2009

Inatsisartut suleriaasianni § 36, imm. 1 naapertorlugu matumuuna imaattunik Naalakkersuisunut apeqquteqarpunga:
(Inatsisartuni ilaasortaq Storm Ludvigsen, Inuit Ataqatigiit)

Apeqqutit:

1. Piumasarineqartut suut najoqqutaralugit kisitsisillu eqqortuunissaat qulakkeerumallugu suliffissaaleqisut amerlassusaat kommunenit qanoq nalunaarutigineqartarpat, tamatumani Naatsorsueqqissaartarfimmut nalunaarutigineqartartut aamma ilanngullugit ?
2. Kommunit kisitsisinik nalunaarsuisarnerat eqqortuunersoq Naalakkersuisut qanoq qulakkeersimavaat ?
3. Inuit sulerusussuseqanngitsut imaluunniit suliffimmik innersuunneqaraluarlutik suliumanngitsut, kommunit ilaannit suliffissarsiuussisarfinniit isumaginninnermi allaffeqarfinnut innersuunneqartalersimapput. Nunatsinni sulisinnaassuseqartut tamaasa atorfissaqartinneqarneri eqqarsaatigigaanni, periuserineqalersimasoq tamanna Naalakkersuisunit eqqarsaatigeqqissallugu pisutissaqalersitsiva ?
4. Kommuneni assigiinngitsuni inuit suliffissarsiuussisarfinniit isumaginninnermi allaffeqarfinnut innersuunneqartalersimanerat Naalakkersuisunit ilisimaneqarpa ?
5. Suliffissaaleqisut sulisinnaassuseqarluartut suliffissarsiuussisarfinniit isumaginninnermi allaffeqarfinnut innersuunneqartalersimanerat Naalakkersuisut naleqquttuusoraat ?
6. Suliffissaaleqisut sulisinnaassuseqarluartut isumaginninnermi allaffeqarfinnut nuutinneqaannarsimasut siunissami suliffissaarusimasut nalunaarsuiffianniginnarnissaat qularnaarniarlugu Naalakkersuisut qanoq iliuuseqalersaarpat ?

Tungavilersuut:

Inuiaqatigiit nukittuut annertuumik ataqatigiiffiusut pilersinniassagutsigit inuiaqatigiinni innuttaasut tamarmik peqataatinnissaat pisariaqavippoq. Taamaattumik pisortat suliffissaarusimasut sulilersinneqaqqinnissaat anguniarlugu naleqquttunik kajumilersitsisinnaasunik neqerooruteqartariaqarput, taamaalillutik suliffissaarusimasut ataatsimoornermut tunniussaqaarsinnaaniassammata aammalu imminut pilersulernissartik isumagisinnaanngorniassammassuk.

Kommunemi ukiorpassuarni sulereerlunga ilisimalersimavara suliffissaaleqisut amerlassusaat pillugit kommunenit nalunaarutigineqartartut pissusissamisuunngilluinnartumik oqaatigisariaqakkannik ingerlatsivigineqartut, tamatumani Naatsorsorsueqqissaartarfimmut nalunaarutigineqartartut aamma ilanngullugit.

Naatsorsueqqissaartarfiup saqqummersitaani taaguutilimmi: "2008-mi illoqarfinni suliffissaaleqineq" atuarneqarsinnaavoq inuit sulerusussuseqanngitsut imaluunniit suliffimmik innersuunneqaraluarlutik suliumanngitsut, kommunit ilaannit suliffisarsiuussisarfinniit isumaginninnermi allaffeqarfinnut innersuunneqartalersimasut. Inuit taakku taamaalillutik suliffissaaleqisut kisitsisitigut nalunaarsorneqarnerannit ersigunnaarsinneqarput.

Inuit "taamaalineqarlutik nuutinneqaannartut" ilaatigut ilaqassapput suliffimmik ilumut paarsinnaanngivissortunik aammalu inunnik suliffissamik innersuus-siffiqineqaraluarlutik sulerusussuseqanngivissortunik.

Siuliani apeqqutigisama akissuteqarfigineqarnissaannut pissutaavoq, suliffissaaleqisut tamarmik sulilernissaat qulakkeerniarumallugu naleqquttumik neqeroorfineqarnissaat isumagineqassasoq isumaqarfigigakku, aatsaammi taamaaliornikkut suliffissaarusimasut imminnut tatiginerulernerat annertusarneqarsinnaavoq aammalu suliffissaarusimasut imminnut pilersulersinnaanerat aqutis-siunneqarsinnaassalluni. Taamaattumik eqqaariikakka tunngavigalugit kisitsisit paasissutissiisut eqqortuussasut aammalu suliffissaaleqisut tamarmik taakkunani nalunaarsorneqarsimanissaat pingaartittorujussuuara. Qulakkeerlugumi pinngitsoortittariaqarparput "ersinngiusartumik imaluunniit toqqortikkamik suliffissaarusimasoqannginnera". Kisitsisit eqqortuusariaqarput apeqqutaatikunnaarlugu inuit suliffittaarnissamut piunassuseqannginnersut tamannalu pissutigalugu pi-sortanit ikiorserneqartariaqalersimanersut.